

[33.3. Verzameling Aanwinsten / 1985.25]

[f.1r]

Copie

In den jaere ons Heeren dusentseshondertende-  
neghen den vyfentwintichsten dach in der maent  
van meye voor my Melchior Caen, notaris  
gheadmitteert by den Raede van Vlaenderen ende den  
Hove van Holland etc., compareerden in de presentie  
van den ghetuyghen onderscreven Jan van den Driessche,  
inwoonende burger deser stadt Middelburch  
in Seelandt, ende Mathys van den Abeele, in huuwelyck  
hebbende Janneken van den Driessche, filia Matheeus,  
ende in die qualiteyt erfghenaemen van wylen  
Tanneken Rooman, des voorn. Jan ende Jannekens  
moeder was saligher, ende in dezelve qualiteyt  
erfghenaemen van wylen Laureyns Rooman,  
overleden tot Ghendt, haerlieder oom was van  
haerlieder moedersweghe van halven bedde, de-  
welcke in dezelve qualiteyt hebben gheconstitueert  
ende machtich ghemaect by desen d'ersaeme  
Matheus van den Driessche, des voorn. Jan ende  
Jannekens vadere, poorters deser voorn. stadt  
Middelburch, hem ghevende volcommen macht,  
last ende auctoriteyt speciale, ende absoluut  
ende zonder ander last dan dese te moeten  
veewachten<sup>1</sup> om vanweghen hemlieden constituenten  
ten sterfhuuse van den voorn. haerlieder oom was  
te anveerden alzulck part ende deel als hemlieden  
by zynder aflivicheyt anbesterven ende ghesuccedeert  
es ende met zyne weduwe te verstaene  
tot schiftynghe, cavelynghe, lotynghe ende deelynghe

---

<sup>1</sup> lees: 'verwachten'

[f.1v]

ofte met dezelve te handelen van uutcoop ende  
uutgrootynghe, d'zelve haerlieder partyen t'hemwaerts  
te reserveren, die te vercoopen, veraliëneren, cederen  
ende transporteren met alzulcke sollemniteyten  
ende verbanden van guarramt als hiertoe  
zullen requireren, gheobserveert te zyne volghende  
de costume ende usantie van der plecken  
daer dezelve goederen zullen bevonden werden  
ende omme voorder ende van der ghelycken te  
moghen vercoopen ende veraliëneren oft verhueren  
ende verpachten voor zulcken termyn van  
jaeren als denzelven haerlieder vaeder goedduncken  
zal, oft oock zelve moghen ghebruucken alzulcke  
partye van huusinghen, landen ende gronden van  
erfven als hemlieden anbestorfven zijn by den  
overlyden van wylen de voorn. haerlieder moeder,  
in wat quaertieren ofte landen dat die oock  
zullen bevonden wesen ende om tot allen fyne  
te compareren voor alle heeren, hoven ende  
gherechten daer zulcx verheyschen zal, alle  
pennynghen te ontfanghen quyctantiën, acqyten ende  
affscheydinghen te verlyden, eenen ofte meer  
nevens hem te substitueren, hebbende ghelycke  
macht oft ghelimiterde, ende omme generaelic  
ende speciaelic by de voorn. haerlieder vaedere  
in alles te doene dat zilieden constituenten zelve  
zoude connen ofte moghen doen allom over ende by  
wesende als waer 't dat ter zaecken voorscreven oft

[f.2r]

dien dependerende breeder last behoufde dan voren ghemelt staet, belovende onder 't verbandt alles naer rechte daertoe staende te houden over goedt, vast ende vaillable voor nu ende ten eeuwighen daeghe, alles hetgene dat by de voorn. haerlieder vadere ende zyn ghesubstiteert in desen zal gehandelt ende ghebesoingniert werden ende elcken van alles om last te houden opdat noot zy, behoudens van allen ontfanghe doende rekenynghe, bewys ende reliqua des daertoe vermaent zynde. Aldus verleden op 't registre myns notario residerende in D'Wapen van Audenaert op de maerct deser voorn. stede ten overwesen van Bartholomeeus van der Meere, deser stadt camerbode, ende Joos Haeck, voerman, beyde ghetuyghen hiertoe versocht. Actum dach, maent ende jaer als boven ende was onderteekent M. Caen, notaris publicus ende was ghecachetteert met zeker cachet daer opghedruckt van groenen wasse. Ghecollationeert jeghens 't originael instrument wesende ghedateert ende onderteekent als boven ende daermede bevonden accorderen. My t'oorconden,

P. Double  
1609